

FG-Jahresrückblick 2024

Co-Präsidentin Monika Marty

Gstartet hemmer im Februar, wo mier üs üs vo de Polizii über Cyber Criminalität informierä la. De Kurs isch mit fascht 30 Pers. sehr guet bsetzt gsi.

De Vortrag vom SKF über Ökobilanz Ernährung, hemmer müesse absägä wäge zwenig Aameldige.

Denn hemmer für d Chind ä Handletteringkurs abote, wo de Chind viel Spass gmacht het.

Ende Mai hemmer üsi Musig a ihrem Jubiläumsgalakonzert derfe unterstütze. Mier hend mit 13 friwillige Vereinsmitglieder de ganz Service überno und derfür ä schönä Bazä i Kasse übercho.

Bi de Kathrin Müller simmer chli kreativ gsi und hend Makramee knöpft.

Endi Augstä simmer früe ufgstande, dass mier de Sunneufgang ufem Wildspitz hend chennä bestunä. Nacher simmer es schöns Trüpli bide Luzia ide Gehre iikehrt. Sie het üs es wunderbars und feins Zmorgebueffe für üs bereit gstellt.

Vom 6. – 8. September isch Steine in usnahmestuestand gsi und mier hend 900 Jahr Steine gfiiret. Es hent 30 Fraue vo üsem Verein tatkräftig mitghulfe.

Im September sind 25 Fraue bim Maurizio und bi de Seriana ga Spaghetti esse, wommer bigost nid verhungeret sind. Und en Limoncello hets natürlich au nu offeriert gä.

Ade Chiilbi hemmer 76 Gläser Kunfi a üsem Stand verchauft und 99 Persone hend am Wettbewerb mitgmacht. Dia glücklich Gwünneri isch Cornelia Holdener gsi.

Üse Tagesausflug het üs uf Nidwalden gfuehrt. Zerst simmer ga luege wemmer Salatsauce macht bi Brunos Best. Nached Zmittag mit Hindersi Magrone hemmer Kernser Teigwarenfabrik aagluegt. Natürlich simmer nid mit leere Händ hei cho, ai det hemmer d Fabrikläde guet unterstützt.

Chli unheimlich ischs im November worde, wo üs de Guido Schuler sagehafti Gschichte rund um Steine verzellt het. Wissider nu de Bachhäggl „meine Güte“ aber das feine Fondue derna het üs de wieder

munter gstimmt und diä eint und ander isch de mit eigite Gschichte verzelle voll i Fahrt cho. Rundum ä gmüetliche und lustige Aalass.

Ade Elisabethenfiir hemmer 9 Neumitglieder chennä ufnä. Anschliessend hemmer es feins Apéro im Hirsche chennä gniesse wo üs de Alex nu äs ganz feins Apéro Getränk offeriert het.

Anfang Dezember simmer wieder emal 2 Täg anä Wiähnachtsmärcht gange. 18 Fraue hend in Stuttgart zwei schöni Täg erläbt und sich wiähnächlich verzaubere la. Au det gäbts nu diä eint und ander Anektote zverzelle. Aber das chönet diä wo derbii gsi sind.

Au üses Messeteam isch au wieder fliessig gsi und hed 11 Messe organisiert und mitgstaltet. Mier hend mit de Lauerzer Fraue ä gmeinsami Mäss gfiiret und sind aaschliessend zum Znüni iiglade worde. D Maiandacht wiä immer ide Klosterkapelle mit anschliessendem Kaffee und Dessertbuffet im Altersheim. Zur Uswärtsmess simmer id Ob-Häg Kapelle gange und de hemmer im Dezember nu en fiirliche Roratemesse mit anschliessendem Zmorge gha.

D Nicole Steiner het 28 Babybsuech gmacht und het ihnä es chlises Präsent vom Frauenverein überreicht.

Fliissigi Helferinne hend 60 Alleinstehenden Gschänk verteilt und mier vom Vorstand hend 23 kranke oder verunfallte Frauen bsuecht. Mier sind immer wieder froh, wemmer vo üch erfahret, wenn öpert im Spital gsi isch. Schusch bechund mä das de hald mängisch nid mituber.

Zurzit zellt üse Verein 382 Mitglieder.

Zum Schluss möchter mier üs bi allnä ganz herzlich bedanke wu üs dur ds Jahr dure tatkräftig halfit und sich zur Verfüegit stellit. Ohni üch gientis nid.

Isch doch schön ä so grossi Gmeinschaft vo Fraue zsii wo sich hälft und unterstützt.

Das wärs gsi mit üsem Jahresrückblick 2024.